

四庫全書

集部

欽定四庫全書

集部

東江家藏集卷三十四至
六

詳校官監察御史臣龔駿文

中書臣劉源溥覆勘

總校官知縣臣繆琪

校對官檢討臣王鍾健

謄錄監生臣閻允中

欽定四庫全書

東江家藏集卷三十四 後集

明 顧清 撰

歸來稿

賦一首

秋雨賦

予南歸之明年壬午秋七月大風雨拔木害稼民庶
勞止又明年八月復然乃作此賦

靄重雲於八表兮陽精匿而藏暉雨淙瀧而不止兮風
號呼而相威奔流起於庭礎兮簷瓦瞥而鴛飛出門不
可以尺咫兮渺予思於天涯杭稊紛其卧壠兮聲未絕
乎棹車亦既芒而且穎兮恐遂淪以為苴縵絲蘿之交
綴兮遲美人之采掇桂含中而葆貞兮思揚芬於月闕
併披鬟以錯揉兮竟狼藉而糜滅芙蓉遜彼桃李兮夫
固覲於秋芳有黃花以為伴侶兮亦奚憚於寒涼枝摧
幹拉兮掩袂江渚企踵東籬兮泣涕如雨哀衆芳之寡

祐兮感人生之多罹望美人其甚邇兮隔重雲而莫致
之泐陰晷曠啓復閉兮忤鬱悒其增淒緬予懷之耿耿
兮亦匪他之故也秉明明之帝衷兮枉與直其難互也
蕢菜施不可與同室兮思桂椒以為樹也蹇獨立此中
洲兮苟有獲吾其與也越人既賤章甫兮吾寧從以翦
髮曰兩美斯有遭兮固宜終歲而脍脆蕭蘭之異本兮
忱不悟其善移雄鳩素謂慤謹兮翩背憎而巧辭坦周
行而信步兮忽吾蹈於虞咎既顛擠而未隕兮田疇依

其農圃謝公之秉國兮引東山之絲簧裴相之成功兮
開綠野之新堂吾誠不敢希二公之鉅麗兮庶髣髴乎
甫里之與柴桑歲冉冉其再周兮歎芳菲之遲暮將無
勤而有獲兮吾安敢改此前度日窅窅而下馳兮洵澎
輶其未休撫闌干而徙倚兮見歸禽之啁啾衰榮何獨
匪天兮傷垂成而罹厄彼殘葉與陳根兮又奚欣而奚
戚黷相向兮無言獨徘徊兮隱惻重曰一氣平分兮四
時成折膠流金兮非有情風雨有時兮震憑凌徐觀其

定兮憺以寧謂予不信兮朝太清皦皦白日兮中天行
辭一首

歸鶴辭

家有雙鶴飛去旬日龍山都諫得之以歸適予生辰
會客與竹泉杜君偕至四坐咸喜舉酒屬予為歸鶴
辭客去而辭成既以為龍山謝并寄竹泉為一時嘉
話云時癸未正月也

鶴飛去兮空江長煙鶴歸來兮春酒賓筵入門兮矯顧

馴予階兮繞予軒淺水兮平田懷穀雖兮宛當年忽飄
然兮何意思寥廓兮翔騫仙人兮華表俯城郭兮依然
信水雲兮增曠寧舊巢兮長捐廉珠兮不遠和璧兮終
全哄滿堂兮一笑歌南飛兮間朱絃惟人生兮一世與
萬物兮周旋雖含靈兮我異同聲氣兮相宣鳳千仞兮
覽輝而萃止鸞五色兮顧影而踟躕苟顛顛於飲咏兮
亦奚以間於鷹鷂月明兮沙渚縈縞衣兮暎修竹之娟
娟

詩一百三十首

題畫留楊士宜別

辛巳五月十日

隱隱青山渺渺江
蘭舟過處水花香
故人別後能相憶
時展新圖送一觴

是日晚獨酌小吳山下

捲却圖書坐晚涼
小山松柏共蒼蒼
本非清廟朱絃器
曾上鑿坡白玉堂

聖主湛恩寬雨露
美人嘉贈比琳琅
一杯自勸忽成醉

明日扁舟真故鄉

十一日晚登舟已大醉夜夢讀書喜而有作

年年指作還鄉計不道還鄉是此年
便整朝衣辭漢闕旋收行李上吳船
皇恩未報兒孫在清論猶存首領全
千里客途聊足恃夢中長自理塵編

天津弔張千戶

南客停舟問草堂北人相見說文張
寶刀金甲閭清世緇帙牙籤有古香
仙夢不思塵路險別懷應共海天長

他時化作遼東鶴還指華亭是故鄉

千戶名信喜讀書
自金山調天津

天津曉發

層城高閣倚蒼茫南客歸舟此望洋
天運亦如河勢轉年華爭得海波長
踏風輕燕翩翩語近水閒花細細香
遙看黃頭牽百丈此身今已在江鄉

新橋風雨夜泊用生辰飲酒韻

驟雨飄風不終夕江山萬古橫
青碧人生此意要識取
身在乾坤誰主客神仙十洲更三島
將相五侯連九伯

當年富貴窮意氣畢竟松林紙錢白曾聞冠劍畫麒麟
復道軒懸賜金石英聲白日飛紫電高槩雲松倚青壁
時移地改須臾事側耳清商非舊拍朱門華屋自荆杞
青雀彩鸞空絡繹豈知此日陶家翁葛巾曳杖柴桑陌
書生濩落靡所似少也空空老何益已從西掖伴羣英
又向南宮分半席太農賦粟幾鍾庾奉常書功無寸尺
空江夜眠復何懼歸去扁舟游七澤

六月十日過分水王主事舜夫留宿明日以十

絕句追送次韻答之

潞河流域碧灣環此日何期照病顏
舉目家園疑可見依稀尚有百重山

曾參石室潤鴻休又見蒲輪降鵠頭

近詔起用舊臣

歸去太平

猶許頌未應詩酒只賡酬

扁舟臨發更遲遲無復人間富貴機
却憶少年春試日月明携卷候彤闈

君王六乘代來初雲從飛龍水送魚
敢謂老臣耽暇佚

青山種樹要全書

久矣人間却步行依然枳棘道邊生扁舟始羨江湖子
亂入風波坦不驚

猛虎有時還入市飛鼯何自可凌雲臨風一笑掩青史
只恐今文累古文

急雨翻河電掣空分明此意識天翁老臣負乘今知免
歸卧陶家一榻風

十一日新店牒雷雨

少不如人老豈如併將衰病益空疎茂陵詞筆吾何敢

賴有清言慰索居

吳絲衫子洛京塵點染從來豈一人七字袞華君幸許

更煩松石頌長春

來詩云雲珮霞裾不染塵

識調知音鍾子期愛賢推轂鄭當時老夫病矣無能役
看子飛騰定不疑

十二日至濟寧秦鳳山示和彭幸菴弔古諸作

次韻八首

淮陰侯祠

英雄未遇亦何疑恨是遭逢啓禍基
試論淮陰香火地何如雲夢檻車時
鴻溝未判猶辭徹炎歷方新却構豨
一語夜深三族併此情惟有舍人知

沔南武侯祠

習隆書奏野祠空此地千秋享卧龍
論世合居莘野後際時何忝涓川逢
微盧庸濮爭奔走蛇虎風雲儼衛從
我亦瓣香遙稽首玉京原廟有遺容

廟在都城東與岳武穆文信公並祀

名三
忠祠

滇南思武侯擒孟獲

瀘江五月渡三軍白羽風前斷瘴雲兩字服心知有以

馬謖語

一時成算豈徒云南人總識天威重北伐終嗟漢

鼎分剩欲起公論此事鄴宮吳苑幾斜曛

浣花草堂

浣花溪上草堂幽世亂公來客此州卜築旋應煩地主
感懷時復為君憂飄飄身世遼東管落落篇章鄴下劉
公幹擬駕吳船問遺跡不勝江水日東流

顏魯公祠

鹿兒朝脫錦裯胎鼙鼓中宵動地來兄弟兩州同日起
罵塵萬里一時開遺文金石留官樣古廟丹青落舊材
聞道至人元不死鬼盧空自費陰猜

陸宣公祠

憶昨鑿輿播奉天先生陪從若甘泉文章已出留侯上
籌策仍推賈傅前一自貞元仇正論直從元祐講遺編
高山四海同瞻仰况復桑榆共一川

岳武穆祠

一夕元戎掃地回遺民已抱左衽哀如何寸紙中宵下
竟折長城萬里材本意鳴鑿向河洛自甘浮海過温台
英祠千古猶生氣併入胥江作怒雷

文信公祠

一代文場此雋雄賈生才調武侯忠堪嗟國破家仍破
畢竟身窮道未窮神降紫雲徵瑞始龍歸黑水報君終
丹青窳適宮牆畔不負成仁取義功

十七日渡淮

驚喜呼尊酒長淮此日過鄉園看漸近風水閱來多白
髮從稀短青山許嘯歌却思前去事一任理南柯

廿一日渡江

昨日渡長淮今日渡長江長江更比長淮濶凌空自有
飛鳧雙鳧雙飛風不起天清清水瀾瀾眼中不復見塵
沙只有青山如畫裏青山如畫畫不如十年歸夢繞吾
廬山中猿鶴休驚咤從今日日青山下

四燕詩為吳立齋司空賦

鹿鳴燕

白下西風仙桂香折花歸去燕黃堂文如鸞鳥旌鳥寧榛杞
質比璠璵合廟廊旅語兩階參幣篚歌登三闕間笙簧
安陽畫錦從茲始好薦南山第一觴

恩榮燕

才向秋堂聽鹿鳴南宮春燕接恩榮上公押坐金貂重
仙樂從風律呂清一代文章真幸會三場喫着豈平生

午橋勝日羣仙醉還憶宮花照面頰

慶成燕

殿頭鐘鼓動春雷天子園丘錫慶回塵土幾人紆夢寐
衣冠頻歲許追陪于今鶴髮重江遠當日宮花兩鬢開
青瑣有人遙獻壽黃封還自日邊來

鄉飲燕

合樂升歌動縉紳泮宮開燕禮嘉賓尚書謝政閒居日
太守興賢化俗辰文物正當明盛治典型重見老成人

肩輿十里虹橋晚無限青雲擁後塵

宋西莊壽詩為懋思太學賦是日迎予西郊

白髮歸來荷主恩西莊六十正開尊雲邊江樹收殘夢

月裏天香識舊痕

君家多古桂

綵筆珠璣爭璀璨錦堂絲竹

間清溫南飛一曲從今始百過新腔不厭畱

八月一日奉叔父且閔翁游鶴涇田舍

幾年空作思歸引今日還登至喜堂風浪拍天收短棹
雲山滿目暎斜陽良疇近繞淵明宅修竹遙連大阮莊

清世宴遊那易得，賜金休問橐中黃。

范秉之有詩見贈次韻酬之

鍾鼎園林志，豈違變調批。抹本同機，千年寶歷中興運。
一幅紗巾處士衣，惠遠持容元亮飲。子皮懸想季鷹歸，
小山無數叢生桂，共領幽香亦未遲。

九月三日見梅

枝頭忽見首驚回，墻柳猶青菊未開。應為主人歸太晚，
故將春色點池臺。

章文遠送菊名報君知言其早也而已過重陽
五日矣次韻戲酬併邀東曙澄夫元吉共賞
為是重陽合有詩一枝先遣報君知臨風有恨無人會
恰值淵明止酒時

一年好景尋常過總為東籬菊未開消釋西風兩家恨

傍秋亭下小車來

新作草亭名取汪石潭歸傍
秋風聞鶴唳之意是日初成

十七日得黃克明書報八月四日封事

勁弩分張不露峯疊雙連中巧無前林中袖手心如水

重為西風一悵然

吳克學郎中自義興訪予西湖之上即席有詩
因共游天馬山歷櫻桃灣絕吳松而歸次韻
為贈

漫郎心事漫郎知曾及昭陵在御時風雨幸收千里權
山龍深愧八蠶絲相過轉益滄洲興投贈難勝白雪詞
珍重橫塘晚來別碧雲無限古今思

對菊用秉之韻

塵沙合眼夢園廬
豈謂霜前自把鋤
一樣黃花數行柳
風光敢道洛陽無

竹格繩牀間采楹
野亭新立自題名
晚來一枕西風裏
欲起湘纍問獨醒

次韻唐清之見寄

舊西湖上小亭臺
遠道時時夢裏回
懶散一身今我有
昇平三策待君恢
病多野客傳方與
閒有山人送酒來
若論午橋吾豈敢
竹間深徑倘容開

傍秋亭次韻

茅茨初結構鄰里悅迎逢高樹收殘雨清溪度遠風東
書看好在尊酒未言空為問庭前菊還能桃李容

至日有懷綱菴先生

東去頽波孰與還周旋長憶頻林間松姿不逐群芳改
鶴貌偏於衆羽閒真踐幾人同錦籠樂遊到處有青山
新陽肇錫元正祉爭看萊衣五綵斑

冬至待曉作

掩書明燭坐宵分起視中庭爛五雲占歲喜豐綠舊俗
閉關無擾迪前聞人間冰雪千山湧地底炎陽一燧焚
消息此中輕過眼後來傍睨只紛紛

三江石潭寄和天津曉發詩且得十月初報次韻
瀛海蓬山路渺茫柴門流水自洋洋後來消息人誰在
前去乾坤日已長閤把釣竿移竹影偶尋書卷落芸香
愁來隱几心千里不道江湖自一鄉

網巷和前韻再疊

千艫並進一舸還五色泉南屋數間漸近夕陽宜少息
未先朝露敢希閤案頭緗帙茫如海足底青鞵賸有山
最喜鱸魚不時樣登盤依舊玉鱗斑

次韻高頤元

長憶城東走看春轉頭俱作白頭人

君家東城詩
以立春日至

插花

騎馬知非事把筆題詩故有神懸圃豈知鸞掖貴玉芝
誰數上方珍青真劇有追攀意只恐真仙不易鄰

次韻前人自壽且請入會

物生天壤間孰與天運長日月有薄蝕蛟龍有晦藏木
賤乃多壽花妍類無香先生學古士文不數班揚名場
四十載萬足爭奔忙遺珠滿暗室袖手不下堂德充誘
斯淺神勝體益康譬彼姑射仙無傷亦莫傷時於蒼生
病中宵起徬徨嘉辰集同社作詩代暄涼洛俗遵教禮
頽評公否臧終當齒末坐不作攢眉狂

病齒欲脫兒輩憂之書三十韻以廣其意

我齒落已慣人聞亦尋常今年一齒杌兒曹忽驚皇

云此口之戶位稱文學堂祿算繫崇替言音資品量不
似頤頤間虧殘有遮藏咀嚼縱少利形顏固無傷一笑
謂兒子汝言吾豈忘我本田舍子傳家只耕桑偶然誦
書史遂登文翰場懶散二十載紆朱佩金章槁虛生蠹
蟬負乘來寇攘扁舟四千里隆赫當秋陽親交喜我還
我亦念舊鄉炎焦夾醇酎合沓鍾胃腸致困誠有以扶
顛亦多方根柢既以撥枝條孰能當飜思赤舌初雷風
挾冰霜傍觀為縮頸親知走如狂生還自不意敢復希

太康齒缺患語訛老韓方亦良復云妨貴仕我已歸農
莊此外惟年壽豈不在彼蒼乳飲且百歲我猶能糗粳
所念齒髮衰壯志或少荒百里行未半前途凜瞿塘青
編有聖賢綠野有稻梁持滿自我力幹譽期爾行茲事
苟不忒吾生從短長存乎彼誠善去也誰能防無為重
戚戚此物本太剛

十二月五日莫黃西坡泊漁水窪待曉即事

漁水窪邊夜泊舟荻花飄葉兩颼颼江湖日月摧殘歲

霄漢風雲感昔游未了桑弧心萬里待烹鷄黍恨千秋
無慙獨有青珉字光與長庚一樣流

君與原復墓皆予為志故云

修墓感懷用癸酉奉辭韻

不隨鸞鳳集梧桐歸伴鳧鷖散野塘餘力天將責園壠
修名我已愧文章新添白髮星星短舊植青松箇箇長
畢竟癡頑了何事十年多幸免垂堂

定菴挽詩

公昔還山我出山

公壬子歲謝政予是秋得舉

我歸公已厭人間

公七

月九日卒予
歸甫十日爾

名高白傅身仍健詩比陶翁意更閒鄉里

後生遵楷範廟堂諸老問容顏玉屏西面青瑩刻時有
游人拂蘚斑

歲云晚矣園居獨謠追始惟今斐然有述八章

歲晚園亭木葉稀小窓寒日淨輝輝昇平屢檢新須歷
老懶空存舊賜衣今古一場藏鹿夢江湖幾處釣魚磯
閒來屈指平生事猶欠青山一早歸

桂宮秋燕鹿鳴杯玉陛春闈繞殿雷日月九天垂景氣

風雲四海辱追陪當時華國慙知己

錄文批語
有二字

今日全

身幸匪才試問陸家亭上鶴一聲寧到洛陽來

石渠嚴秘許觀書丈席清華選鉅儒

傅文穆公瀚李文
正公東陽程宗伯

敏道術孔顏留至訓文章典誥救前謨月毫霜札來天

府玉饌金莖出帝厨回首十年空血淚碧霄無路挽龍

鬚

玉堂排日趨經幄丹地分行拱御筵龍躍九淵屏隔座

文華御屏彩漆龍
水日本貢物也

鳳迴三殿闕中天祥雲麗日瞻堯表

金尺瑤籤啓舜編長憶講辰當國忌素祀玄帶儼終篇

故事忌辰

多較講

科第雲階接月梯菲才何幸得攀躋兩朝盛制兼文武

五榜賢名入品題

同考會試者再考鄉試武舉會試各一

白日青空下星

斗綵簾紅燭燦珠犀當時共事今餘幾一半崑崙弱水

西

黃宗伯珣李少宰旻吳宗伯儼劉宗伯春傅宗伯珪徐學士穆皆同事禮部者傅又同考應天鄉試

周官六典肇昇平魯策春秋並五經彤管後先參記載

會典考

黃麻鄭重入丁寧氓編不落涪陵險

實錄成追論會典事

調南京兵部員外郎尋復原秩

米傳羞聞晉史腥獨卧煙江雙雪鬢尚

餘幽恨在丹青

書妖人李咨省事有誣彭文思附以得進者書中官蔣琮逐科道事有嫌而欲

刪節者皆不敢從聞後來頗有更定添入不可知也

書生泥古自家風曾職容臺念始終所願朝廷有夷契

敢將休戚間窮通紛紛尚憶盈庭語鑿鑿誰收秉筆功

聞道初陽渙新命不勝翹望五雲中

初議稱號同奉旨及會議以罷官不

預至是猶未定也

青鏡哀容每自憐世人描畫豈其然

陋容屢畫不似至是復然

朱衣

象笏承君寵野泊林棲本性天
閒引鶴行松徑裏偶尋
梅憇石橋邊西風日送長安信
但報昇平一萬年

過子南舊居還坐新宅有懷一
閤處士書示子

南

百年能幾何今我忽已老
重来舊游地惻惻傷中抱
風光宛疇昔但覺朋游少
原田看日闢垣屋且增好
周覽迴堂序流塵藹芳草
佳兒瑤環秀未食看已飽
詩囊及酒罈還此坐傾倒
林光奄西馳起視白日皎
深情念蘿

附

予弱息嘗許一
問季子田而天

遠意託鴻矯勉旃期努力慰此重泉

杳

祝參議鳴和以詩問訊次韻答之

榮達世所慕棄捐時共傷朝登天子陛下尚書堂鄰
里不知故相隨上河梁揚鈴望九山指顧忽在傍山靈
訝我歸猿鶴亦徊徨江海雲鴻下高岡威鳳翔茲理誠
坦然何必撓衷腸

壬午元旦拜闕回作

三朝玉帛萬方陳
新歲新元新聖人
元德應天乘泰運
歲風從律轉芳辰
樓頭陽鳥鳴先日
雲裏仙桃色醉春
江海老臣遙拜慶
鈞天猶恐夢中身

三日對客語

田農倉積起耕耘
蠶女機絲祭五紋
萬化流行視家政
百靈趨走聽心君
墻間醉酒妻孥恨
暮夜辭金天地聞
此外有占吾弗問
直須親與見羲文

東園與用常子南飲用常出口令曰新正樂事

要予賦詩

共道新正樂事多廿年朋舊此經過紅羅屋下花開早
碧玉枝間鳥語和六博轉曹誇勝采七言流響變笙歌
頻來莫謂韶光惜轉眼薰風舞綠荷

春日與客談舊事有不能忘者紀以小詩

賢科采掇誤知名素卷青衣守進呈兩字早從提筆定

白頭空愧古人情

且廷試吳文肅以編修掌卷或導
子見之不往試日遣吏守予卷以去

且力稱之竟以九重
字失提處二等

洛陽紅紫鬧春光五劇三條錦繡香
跬步不詒今日愧

將軍一語更難忘

初入京宣城衛公屬無與城中富人游及郊外花園飲酒皆有為之言也

二十年前賦賞花詩成不敢向人誇
春風東閣分題試

却望青山感物華

乙未歲和王堂賞花詩有題詩預與花神約之句同學笑之乙卯春試和

前題以話于館中復共一笑

城上青山繞鳳樓朝回無事日尋游
白頭相望滄江外

冷落西風二十秋

自癸亥後連遭家艱癸酉重入都惟一再游李文正公別墅未嘗及山麓

也

炙手當途勢莫攀書生猶作有無間緋袍一語風波際

只恐吾人有愧顏

鄉人有失身權宦者嘗招飲不赴人謂其怒也同官中遂往構之此君乃

以告使為之備

淺薄尋常愧伐檀衰麻纔脫報遷官清華玉署非常選

可識當時下筆難

辛未四月免先君喪五月以缺官推陞有尼之者蓋久而始定云

欲出家園意萬端幾煩飛札下長安春風坐裏雙尊綠

添得西州淚不乾

遷官後未行涯翁屢以書趣癸酉四月至潞河翁方與兩汪飲間之作一

首 醉二

宦途先後上京船每見攙行費挽牽明日水平風力便

一般停權潞河邊

目見身歷蓋非一二而祭酒所親尤親切

官羅新賜印封全擊出天門衆手傳恠道比他顏色異

文皇庚子進來年

乙亥九月賜白鵬紅衣三件內羅一疋永樂十八年造

上元日祭友蘭先師與公佩文遠享胙因呈二

君

新祠香火舊庭階古木依然傍砌臺黃卷一生慙報稱
青衿此日幸歸來晨星落落嗟同輩社櫟蕭蕭歎匪才

安得兩髦還似昔夕陽相伴挾書回

讀味苓所著桑陰夢戲書其後

浮世奔忙夢一場談生開口笑黃梁不知鄭老桑陰裏

更有黃梁一倍忙

盧生富貴五十年
鄭官太師壽百歲

生辰用味苓韻

玉盃清泠沃蔗霜金尊琥珀湛雲光詩歌白雪傳腔緩
舞合前溪引隊長內史功名付煙草野王臺榭亦荒岡
諸君肯向花前醉何必當時綠野堂

東風不管鬢絲長，醉草時看墨數行。
花鳥大家誰彼此，溪山到處可壺觴。
平原相業三千履，諸葛生涯八百桑。
一笑向君重握手，傍秋亭外又斜陽。

次尤南渠元吉韻

堯民仁壽歌堯極，萬里歡聲動殊域。
老臣衰病得歸來，尚欲兩疏希仲伯。
青春燈火連生讌，幾夕狂眸亂朱碧。
朱碧熒煌皆帝祉，賜金本為餘生擬。
篋中抖擻兔園編，夜案猶堪課孫子。
若論天平何敢云，來詩及文
正義莊事君無多。

談觸監史

送富子超使荊州兼簡汪秀夫太守

春風江上木蘭花黃柳隄連白鷺沙寵命北來喧鵲語
使旌西去拂星槎冰壺自許心相映椿樹初看鬢有華
徃見汪齟道相憶此身今在不須嗟

汪時以江
西事失官

別後作用前韻

朱碧驚看眩眼花清冷記數白鷗沙人間又破炊梁夢
海上還瞻貫月槎城柳依依縈別緒江流脉脉送年華

盧仝吻渴茶煙細欲請齊奴暫咄嗟

次高進之生辰韻

老夫初度元正節六十三回月廿三白髮欺人不可奈
青山對酒欲辭酣元從識字先知一未到通方解指南
徑躡寸階今未敢家徒四壁早能堪心香一瓣惟宣父
贅學千岐斷晦菴歸老幸逢新化理迂踈未悔腐儒談
晴簷映日黃綿煦陰磴捫蘿玉佩毳蒼栢轉深霜後色
紅蕉暗結雨中甘層峰浥浥初融雪絕巘霏霏欲上嵐

斗正堯天開泰運塵清瀚海罷征驂從伶且止南飛奏
聽與吳農賦八蠶

遊南莊

春江晴日漾龍鱗笑上蘭舟不問津雲裏遙山指秦望
水邊虛落想春申百年顧我青鞵在雙鬢從他白髮新
歸路月明喧鼓吹鴛鴦撲漉起青蘋

謁外祖墓

古柏森森映墓門路人遙指陸家村陽元可能成宅相

輔嗣只應傳外孫十載宦途惟有夢五更風木重消魂
先淑人沒已久淒涼泉下人難見酹酒空持野釀溫

鄉里諸公會東園願元有詩次韻

東園春燕集良儔竹色花陰處處幽酒令角朋爭采勝
詩篇信手趣賡酬雲中鷄犬誰親見願元談仙佛如指諸掌海上

輪竿我已收南浦小堂仍不惡肯來同泛木蘭舟

新雨江村萬綠肥小園紅白未全稀望塵金谷吾何敢

流水蘭亭或庶幾姚合久拋筇竹杖網菴少多病杖而後行一日夢失杖

遂愈是
日云

顧雍非愛北山薇

馬湖號薇軒
謂紫薇也

今朝重讀高軒

過正始遺音的可希

晚步中庭侍人褚氏問今三月半耶曰然笑曰

京中日日思歸今歸來九月矣喜溢顏面予
聞而欣然記以小詩

京華日日想閑居今日林間九月餘
恠道春來多樂事
朝雲此語亦堪書

飲酒

塵區三十載，川陸幾洄沿。歸來長林下，緬想獨依然。形跡雖從化，中懷庶未遷。親交不我棄，尊俎日流連。一醉靡恡情，漫歌遂成篇。白日高臨照，蒼穹儼回旋。往哉諒匪易，行矣茲乾乾。

故人飲我酒，坐我清湖潯。中燕游後園，倪手交綠陰。側磴度別渚，回堂面長林。西日明遠陂，流光蕩我襟。喟然懷往哲，茲地幾登臨。亭臺無遺構，風木有餘音。想當古人時，豈不亦似今。運去鳴鳥寂，時來蛩蠋吟。無為後者

惜綠醕方在斟

與聶令飲聚奎亭作

亭故江陵汪侯德
卿作聶令新修

三十年前慶落成白頭重此見崢嶸山川不息英靈氣
星漢遙增日月明漫學魯詩歌在泮敢先周士試吹笙
天機未欲分明語夢裏泥金有姓名

游鶴徑田舍過黃耳祠

山靈應道我歸來一徑新添雨後苔高柳直從江路見
細花還傍竹叢開百年天際雲千變萬事林間酒一杯

記得吾家老開府當年曾勸陸郎回

四月廿七日有感

桑陰霽地水侵秧憶在長安望故鄉今日一杯桑下醉
不知何以答穹蒼

閩闔西頭素展陳去年今日萬方新滄江白髮頻回首

雲裏龍顏識未真

是日初御門次
日有賜歸之命

弘治己酉盆池蓮一莖三花八月夢登鷄鳴山

見日出衆以為異是秋予下第而三兒生自

是栽蓮未始成也五月十日方小試盆池一
花追憶往事詩以記之

碧玉波間品字紅
轉頭三十四薰風天機雲錦人看汝
汲水蘊盆我已翁
日畔早霞爭借彩月中香霧已浮空
書生結習真堪笑時復憑闌憶夢中

西園即事

百株高柳眼中栽
十畝荒園手自開
白髮漸多難斷遣
青鞵無恙許追陪
行田數共鄰翁語
看竹時從野寺回

昨日近莊傳喜事水南新築釣魚臺

五月十七日有感

起望青山一浩歌茫茫天意竟云何百年正惜流水短
雙鬢其如感慨多墨客有情悲素繭陽侯無計挽頽波
愁來轉覺漁郎好白首煙江只釣蓑

不涉世則耳無聞
耳無聞則中無撓
也

邑博王東之校文四川却從關中赴春試捫參
歷井之勝過家上冢之榮此一行也兼之而

梁桷同升又以益儒林之美談矣旗亭抗
手歌以揚之

岷峨晴翠落鯨波牛斗靈光出太阿萬里風煙歸攬結
三川麟鳳入搜羅花明帝里春將近雲繞鄉山路不多
往與門生作同榜曲江先後引鳴珂

寄儲麗中時京中客舍猶未售

浮名紫陌萬風花客舍紅亭一傳車閱歲流光駒過隙
關心朋舊手搏沙未能遺跡同寒鴈想見空庭噪晚鴉

捲却雙魚還自笑故人秋早又星槎

趙叔敬僉憲示和東湖詩次韻寫懷因以為贈

袖手青山歛夕暉漁蓑拋在綠苔磯
水心雲月閣相映陂裏魚鳧各有依
客夢幾驚前路險天機誰信此中微
西塘一夜涼風起已覺蓴絲入筋肥

飛將才名困數竒卧龍生計一茅茨也
知世有屠沽樂不療人歌婉孌飢鏡裏
曉粧看的的墻間歸步亦施施
乾坤若竟無真是長使癡人笑不癡

苦吟常日笑寒郊豈為牢愁賦楚騷匹馬看花曾上苑

短筇舒嘯有東臯新知幾折馮驩券

時人有負君物者

舊繡誰

論范叔袍明月滿船江上別一聲聽唱越山高

清時四海卧征輦到處江山路不迷訪古近留吳相宅

普照寺故華亭侯宅

思歸先夢若耶溪紅蓮碧沚元相間

君家有此亭

林鶴梁鷺豈並棲聞說寶峯書萬卷直將牛鼎視羹藜

池蓮着十花中一朶自房中復起樓子舊未嘗

見也

十朶參差一樣紅
綵樓重起綠房中
不知物理關人事
為有文章奪化工
官路曉槐陰密映
客堂春草夢先通
白頭笑我長林下
時傍西風候塞鴻

送高進之應舉用丙午韻

當年早識柯亭瑄
今日初彈貢禹冠
穠艷謝餘知果碩
冰霜歷盡見材難
不妨官柳頻縈騎
自有天瓢為染翰
一樣風光鳳城裏
木犀偏耐晚秋看

用常令子文徵與三兒同應舉用常有詩次韻

為贈

袖裏牙籤一脉香揮毫長笑紫微忙平生忝作通家老
今日看登選佛場清世文章皆炳蔚而翁才氣本巍昂
月明天路涼如水爭羨扶搖接翅翔

楊西潭賦天香玉兎贈三兒行次韻為謝

一氣分職司炎涼商飈夕起回朱光玉蟾飛出海中央
金波萬丈開銀塘上有木犀蟠古香蔭以青雲漱玉漿
垂輝布彩遍圓方吐生億載毛如霜注目廣寒騰紫芒

五紀但說騶虞良亦有白鳳昭明昌玄霜搥成和桂芳
下與濁世開昏狂聖人食之齊彼蒼彼二子者空馳翔
懸崖擘空彩翠彰誰其作者關西郎妙思不受銖分量
翻思少日膂力剛吮豪探韻誇用強偶然朱衣許成章
八分遂使三軍張小兒學步試登場一番已挫鉛刀鋌
南州才士真堵墻又逐陽侯觀渺茫高飛為頡低為頡
秀才但祝今年康五茸西北天衢長五星再啓文明祥

縣學新濬
五星池

新圖玉軸文錦裝新篇古制來栢梁小生何

以副稱揚綠煙蕩漾清暉旁一段麗景難為詳走觀連
日隘里坊為君珍襲重縹緗畱與上林春日併將珊瑚
珉玉賦旁唐

贈醫僧始芳用龍山韻

空王心事藥王名塵劫中間第幾生卷却青囊畱不住
一帆江海看揚靈

覽竇氏回文詩愛其音調古擬作六首

神聖興運乘元真宸嚴尊居端珮紳裡宗敬事肅秋春

仁賢登揚振幽淪陳思懷憂隱呻嘯

高崗梧棲鳳鳴和韶簫按曲引工歌調鼎金鉉玉梅嗟
朝堂明辟列衡阿巢由軫懷憂如何

江湖放浪狎飛鳧雙漿畫舟隱蒲菰風驚夢午酣餘
窻虹貫月夜堂虛扛鼎巨筆采椽如

商金淒冽冰絲絃蒼青湛澄明空煙昂昂立鶴霜庭前
慷慨抒懷寄詩傳長路縈心愴華年

皇羲肇文成三五

典墳

光輝蔚郁深侵涵細縹珍襲重巖

函章組謝來歸村南筐箱葬繭作老蠶

紋繡重襲密麗綿筠金間玉續匏弦分派九河洪祿宣
薰蘭承蕙藉簡編墳典遺基隆聖賢

鄒邦輔求詩為塾師吳晉卿壽

鄒陽書裏見吳融曾記江樓一笑同華髮西風吟別後
碧山寒雨夢游中六千甲子春方始再世門生道愈隆
擬折梅花寄君壽杖藜行遍鶴橋東

送郡守張君樞還書感

客路心知有往還，驛亭回首一酸顏。
孤雲去鳥重江外，炎日淒風兩月間。
名與赤誠流白簡，身將朱紱葬青山。
相逢且莫深惆悵，猶勝高涼不賜環。

君以言事謫
電白典史

送胡仲申僉憲四川

落落風標四坐傾，翩翩豸繡五花明。
星分井絡承天寵，路轉江門識使旌。
三尺清平幾官府，一經忠孝舊家聲。
行邊好景還堪畫，綠水芙蓉繞郡城。

次韻秦鳳山舊歲須歷喜雪

汪給事
得之寄

初元新朔遍堯天
銜袖彤庭快覩先
武接夔龍曾此地
夢回霄漢已三年
卿雲又屬賡歌裏
飛雪應消喜氣前
白首長林更何事
只將多稼擬春田

次韻中秋無月

一年好景三秋半
把酒還思玉宇寒
細雨不堪論舊約
癡雲空自惱清歡
江頭幾處凭闌望
天上何人倒影看
擬續新聲歌水調
長虹終夜繞豪端

唐民重身短而長於醫且善吟詠張龍山給事

呼為小仙君遂以自號

青冥上界多官府城郭閑居且靜便留客坐談成橘隱
下簾高卧即壺天新詩不作人間語靈藥多從海外傳
乘興有時還過我小車花下亦軒然

寒菊次秉之韻

蹙金攢碧一叢深延引三陽自六陰因笑百泉觀物老
只從梅蕊見天心

姚綱菴示讀近報及和葉竹憲二首次韻奉答

并寄竹窻

十載京塵撲面紅
角巾常恐後諸公
陶潛此日方知是
徐邈當年也號通
近海溪塘魚並美
中天樓閣棟俱隆
相期甚愧先生厚
無復郊亭七日龍

隋珠趙璧魯堂璵
本自遐生又僻居
搜剔果能無逸墜
明揚應不載詩書
梅邊彩筆流清詠
竹裏幽窻想舊廬
襴褐並游今幾在
白頭相望渺愁予

次韻葉竹窻有懷鶴灘惟馨

城頭西日淡寒輝回首同游跡漸微華表不歸丁令鶴
帶圍空褪沈郎衣多情轉益黃花病上藥難翳白髮稀
惟有九山長不變自從相識見崔巍

繩孫生南渠有詩次韻

前年花甲報更旬今歲庭萱送喜頻

花皆成實實
復起苗茫然

姚察

著書方有託

察著漢書纂訓曾孫
廷作紹訓以明之

鄧侯傳世敢同倫武帝

封何
曾孫

賓筵笑我連霑醉學海從渠遠問津若見阿翁論

父執杖藜還許奉清塵

南渠少同學其
子與長兒同歲

網菴和西園即事疊韻奉酬

綠溪野菊不須栽直到深冬爛漫開
白日在天隨處照
青山無主要人陪酒香鄰屋時相引
詩送郵笥日幾回
若話舊游公亦懶千江波浪九層臺

雪景為鄭節之題

蓑衣蒙肩笠覆頂擁髯倚釣坐深暝
扁舟到處即吾家
風雪不憂天地冥金門朝日五彩暉
朱衣前進白簡隨
鞠躬屏息虞讒譏為問此翁知不知

臘月六日視墓地歸作

地在鳳凰山南祥澤匯之北西出余山有小莊

百歲生涯一顆逢
芒屨踏遍五湖東
豈知海鶴冲霄地
只在家山舉目中
舊識野人謠識熟
無心著策繇言同

筮得家人
六四及師

餘齡此外嗟何事
俛首臨深履薄翁

兼山並壽為何參之二親賦
十二月望

東山亭亭青挿空
西山娟好金芙蓉
兩山並秀何所似
孟光白首陪梁鴻
兒孫學禮仍學詩
羣峰羅立玉參差
雙尊臘蟻更拜慶
醉過梅稍月滿時

弔宋西莊用己卯寄君韻

華屋高門接兩莊
川原暮色黯青蒼
歌鐘不復樓心燕
淚眼來看膝下郎
長路客心知耿耿
舊緘書跡自行行
祇應堂構無遺恨
荆樹春風滿院香

淑人生日奠柩前仍用乙亥歲韻

此生敢道不逢辰
繡幃曾看內苑春
謝眺青山仍疊嶂
維摩空室幾由旬
傷心歲月難忘舊
滿眼兒孫不當貧
一語報君須慰意
鳳岡南麓有新墳

東江家藏集卷三十四

欽定四庫全書

東江家藏集卷三十五

後集二

明 顧清 撰

歸來稿

詩九十五首

癸未元日用壬午韻

歌枕殘宵萬跡陳
白頭那復笑陳人
書囊上下三十歲

甲子依稀四百辰

新年六十四蓋三百九十餘甲子矣

冠劍此時天上會

湖山前日夢中春
涓流鉅海無窮意
俯仰乾坤只病身
雪後登樓用沈西潛韻

殘年擲我去堂堂
頗覺青春日月長
載酒有人過栗里
上書無事訟安昌
憑闌草木欣欣動
倚棹鳧鷖款款翔
別有淡交真味在
萬籟斐几碧芸香

凍雲飛散曉來天
舉目青山九點全
竹筍迸階猶帶雪
柳枝低檻欲生煙
悶尋廣受還鄉事
偶到機雲入洛年
八百里封還若此
龍陽何況木奴年

山人約為予
種橘故云

初九日見紅梅約味苓同賞是日新作水樓亦
欲詩人過之為後來嘉話也

白牛溪上負苓翁華髮蕭然碧兩瞳坐擁詩書忘永日
醉吟花柳又東風王侯宅第烟霄外泉石交游夢想中
風閣水簾今在眼且來先看早梅紅

立春有感用辛巳韻

憶昔諸賢秉化鈞萬方同醉洛陽春
綠縷紅縷綠盤心菜
剪碧塗金勝裏人
往事不堪重理夢短吟聊與當傳真

君王聖德同堯舜願倚青陽頌日新

旦起偶書

起臨青鏡拂冠巾又見江南一度春老覺杖藜行處穩
病於方藥試來真吟思好句翻疑夢坐愛名山不近人
六十四年多少事向來何敢道全身

生辰次味苓韻

生筵酒盞接元春次第風光到此辰夢好協公桑蔭傳
詩來錫我上方珍園林鐘鼓非前輩廊廟江湖亦老臣

孱弱願期交羽翼共瞻堯日萬年春

次姚綱菴韻

少年學步希攀龍後生先輩殊而同文場接軫借光價
海月下照滄江虹當時庠序總豪俊公於其間尤長雄
歲行壬子我忝竊公意夙與神靈通黃旗捷足走夜半
隱若平地行豐隆升沉不作時世態江頭別酒雙壺崇
劉蕢何必下李邵雲龍竟爾乖相從虛名我亦自知我
厚挹世豈能忘公南安一世僅小試梁棟已奏蘓湖功

至今諸生誦遺訓有若漢士希林宗
閑居詩筆老益進人意所澹公偏濃
犬馬之齡亦奚有大篇投贈何春容
祓除牛舌鷄口穢滌蕩柳眼梅花風
寒林索莫幽谷閑頃刻萬景回春融
塵區奔走三十載微命豈不懸青穹
檣掀舟舞幾沾殆夢中每想垂綸翁
致君有意苦才薄擊壤且逐康衢童
養魚池南鶴涇北歸來兩見春花紅
去時衆雖皆長大丹玉冠頂黃金瞳
長鳴一聲起煙際哀怨似弔吳臣忠
洛陽羈客竟不返草堂空鎖青山松

小奴獲稻試春釀一瓮曉熟天門冬
弧南光燭斗牛分
諸老百福神皆充相携一笑醉花底
便可寫入丹青中
不作雲臺卧華頂亦合桓榮陪李躬
尋思却恨公不飲
未怕北海尊壘空

生辰會兩學廣文有以煙火為戲者因成四韻
貯煙含霧結機絲旁絡中聯鬼不知
一炬么微平地起
萬花紛駭入雲披龍蛇雜出星辰下
霹靂交從指掌馳
直到上頭人喝采滿衣灰燼踏泥歸

諸廣文見和疊韻奉酬

萬變靈通火一絲，只應師偃未曾知。
寶王珠絡浮空下，神女龍綃隔霧披。
明月上時雷礮發，暗塵驚處火輪馳。
詞臣正憶鰲山盛，為謝嘉賓緩緩歸。

別駕高君解綬歸，衆皆嘆惜競為詩。
以送之予

亦繼作

聽鶴亭前酒一卮，柳條花萼共依依。
也知物色皆天子，但覺風光與願違。
羈紲可能長客路，雲山從此謝塵衣。

溲然冰玉脂膏地猶喜吾人有是非

君初受任吏部稱其文其在官民不擾而事治奉身之物皆平取市中去之日無一錢寄而郡僚中獨去君一人此羣情所以不厭也

鍾卿密繡衣示近報有懷傅文穆公

十廟威神儼在天萬邦黎庶尚多賢臯夔事業誠遐矣
房杜襟懷亦朗然兩手果能藏萬目一時何以易千年
令人轉憶臨川老屈指懷憂廿載前

公嘗與西涯論人才至某科曰如何

得此一陣
過也故云

六言

園林日日春風市喧不到牆東犬卧落紅籬下鶯啼新
綠陰中小樓平跨林梢足底昏明兩潮藏舟不須巨壑
度鶴即是仙橋乍去還來沙鳥將開半落林花社鼓前
村隱隱機聲別院啞啞闌干欲過還畱綠肥新漲溪流
花落游魚影亂風和鳴鳥聲柔涉世已知踰限讀書元
自不多幸可澆花種竹還思列戟鳴珂霄漢九重雲日

江湖萬里風煙田父相逢偶語今年大是豐年遊絲將
墮復舉好鳥急過遺音總是少年光景只多往事關心
爲愛夕陽晴好不知行過秋亭墻角桃花片片枝頭梅
子青青

桂林譚君教吾松六年甚得士子心忽聞罷去
相與駭歎而莫知所從徐考其名與君之爲
人正相反也於其行詩以白之

花自含仁絮自飛春風着物本何私祇應鶻鳩中宵起

不盡芳蘭九畹滋江月有情千里共相流無恙此心知
瑞蓮池上題詩在總是諸生去後思

數日不過西亭忽木蘭著三花平生所未覩也
涉筆書此招味苓同賞

天隨詩裏洞庭船玉貌雲孫故儼然游遍洛陽曾不見
賞音今日付朱絃

味瀾

飛泉出巨壑百里回瀾翔酌之味其甘仰視雲山蒼山

高土滋厚土厚泉益芳浸灌富畦壟回環固陵岡誰知
一滴潤中有千林香先生青烏冑家在雲水鄉常言九
峯青孰與三江長妙契一以握川靈走奔忙我老懷首
邱君來協吾祥盤盤鳳山麓南趨向朝陽溪流左右帶
落此團玉光顧會本舊浦祥澤亦名塘湏君一染指為
我終其臧

夏君原宿世傳地理陰陽之學而自號味瀾蓋以山
澤氣通邈流可以知本亦昔人飲曹溪水而知上有

佳處之意也予為山妻求葬地得之鳳凰山陽君議
與予合為賦此詩

仙鶴褚道人嘗欲得一詩久未能答近和元吉
壽篇見者謂似游仙體因書以貽之然終不
近也

曾立蕭臺縹緲天塵心一墮八十年却從海上三山駕
來集城南五色泉遼鶴再聞中夜語葛龍深抱千時涎
綠章赤字無人檢猶在虛皇玉案前

四月七日陪約菴適齋二太守東園鴻臚龍山
都諫登超果一覽樓望西隱堂有感還飲翠林精
舍作時西隱火已一年而寺主傑峯亦化去矣是
日翠林亦病出蔬饌延客故末句云云

天台樓閣冠羣山童穉游歌日倚闌

予少讀
書寺中

歲月不知

青鬢改松梧長繞碧窓寒塵龕落日悲彈指劫海何人
更助瀾賴得遠師容客醉不教啼鳥怨春殘

來鶴樓次周北野韻

江上樓成記鶴來鶴飛江外幾徘徊仙人不作臨臯夢
游子新從洛下回天末遠風傳嘹亮竹間斜月見氍毹
何時重續城南會高詠南飛送一杯

閏四月三日北莊分秧約味苓同觀與聯句

千金難買俞塘北百畝新開水曲莊相約明朝移短櫂
綠陰傳酒看分秧

綠陰傳酒看分秧曲水縈迴送羽觴

味苓

畫裏蘭亭詩

七月清一時流詠遍江鄉

味苓

蔣文藻水竹村居

閒身不屬樊籠瑣茅屋偏宜水竹村
盡日枕書芸閣靜
有時揮翰墨池翻娟娟翠羽涼
生坐落落清瑤澹逸門
羸得白頭心眼淨春風長見長兒孫

出都時館中諸君有晚庭侍詠聯句其後不預
者相繼有作近方寄至次韻荅之

匡時無計乞身難望望雲西九點山
雷雨恩深天作解
桑榆景近鳥飛還詞中郢客重聞調
枕裏盧生已度關

猶有感懷詩未了
桔槔長夏不曾閒
今夏苦旱

曾傳初詔未央前
舉目金容尚儼然
天地冰霜春不間
江湖星斗夜常懸
無心海鳥當人下
可畫雲山與屋連
珍重故人相慰意
一時分付釣魚船

夜夢為人作幽居詩得二句嫌其寂寞而止既
寤因足成之

苔生井幹草生階
不見馬蹄門外來
風月滿庭書滿架
一尊時對碧山開

和楊時望新居雜詠

盛年馳遠志將老思閒靜天運有消息人事遞豐省自
從大道喪階級生榛梗欣榮亦偶然淪伏豈非幸詩班
未可笑過涉且減頂惟慮西潭月照此胸中狀

道存無窮達志適忘遠近子桑七日病豈憶惠施問由
也號升堂乃作窮途愠君家三賦翁天球振空韻才高
徒後名事往嗟頽運何以發清謠東鄰有芳醞

名

君隣家
白酒有

卜居湏仁里結友湏良契湘纍江潭行紉佩必蘭蕙蓬
麻兩因依腐蠶終蝥蝻君看稷下生肯乞墻間祭吾徒
幸閔居塵境息啁嘑玄文倘許窺烏藤尚堪曳

月出新雨餘桐陰落金井經旬困隆鬱捫頸欲生癭飄
然懷靈仙願作綵鸞請鸞飛空冥冥去入無窮境靡求
焉有爭不暑安知冷下視區中人紛紛逐風影

題阮襲之合浦還珠卷

子喪目與喪孫歸目亦明嗣承真一線游歷恍他生舞

袖春花媚書燈夜案清雲階繩武地細話十年情

邂逅驚遲暮睽違熟姓名三場先後榜四海弟兄情病
阻臨溪餞愁聞觸暑行因詩叙竒事流詠滿江城

弘治壬子麻城阮先生襲之校文應天而予忝薦名
已未予同考禮闈而襲之登進士第其後襲之以哭
予喪明棄官家居不相聞久矣嘉靖癸未會松城道
乃孫來歸病目復明事相與驚歎判府胡侯因出董
大參及予舊僚胡君孝思序記屬為嗣音而先生行

矣隆暑抱病不能出餞姑書此別卷一以見君家嗣
續之不偶然一以紀三十年場屋斯文之好庶子孫
之無忘云爾

讀簡齋法駕道引詞有感擬作五首

驂龍駕驂龍駕龍駕引鸞旌羅列三光俱在下青雲回
首玉皇城風露杳冥冥

金風裊金風裊飛珮度銀泓仙袂六銖涼似水搏桑東
望火雲蒸回首指蓬瀛

雷隱隱雷隱隱列缺挾飛車一擲火鈴三萬里人間何
處着妖邪歸路海天霞

祥雲起祥雲起雲起四天明寶月宮中光氣滿流黃一
道墜明星萬壽聖人生

歌萬壽歌萬壽稽首玉宸尊下視九州雲五色羣龍濟
濟會天門一炁儼長存

再用翰林諸公韻

人間行路古來難亦有南山與北山萼菜可能羊酪美

張翰不共陸機還
雲林窈窕時孤往
蓬戶尋常夜不關
翹首羣龍會霄漢
滄洲天放老夫閒

糠粃因風偶在前
向來淘汰豈徒然
臣生得失鷄蟲比
帝德光華日月懸
野鷺自非威鳳侶
三江元共五湖連
夜來一枕游仙夢
親見秦皇駕海船

讀天游集

君平成都隱室無
儋石儲羅冲家萬
金往遺傾後車我
餘子不足遺我將
安居笑謂平生過
酬稱良非虛我嘗

宿卿家周覽子室廬見子朝夕間汲汲無少舒我卜不
下堂垂簾常晏如餘錢累數百凝塵委牀隅以茲對相
較豈不我有餘王生景芳躅特筆天游書覽之重有感
長歎仰天衢斯賢誠曠代冲也今亦無猶知敬賢也

文僖尹西洛賓幕皆鴻儒希蹤郭延卿野服臨其居荒
僻少過從未見諸公如菲然具盃案班荆叙歡娛日昃
羣吏集麾蓋滿庭除公等皆何官騎從爾云都盤飧靡
加味體貌不殊初談咏西山暮出門送登車諸公恍自

失累日增歎吁襟懷有如此聲利豈能驅下視望塵子
飛龍翔太虛

枯木竹石為鄭節之題

霜凋孤桐樹槎牙碧琅玕夜半山月出飛下兩青鸞幽
人適不寐清影上闌干

聞客言有省

也識隨時好難忘泥古心交絲易為幔孤植鮮成林邈
矣期千歲悠哉寄一琴草堂人靜夜三諷白圭吟

和楊時望

睡起江樓日未頽，小園籬落豈花開。
歸遲野鶴鳴相及，見慣沙鷗眼一猜。
春夢一場成獨笑，秋風萬里為誰來。
木犀枝上青青蕊，已辦分香入酒杯。

南京摺扇名天下，成化間尤重李昭骨。
王孟仁畫兼之者，誇以為竒而今不可得矣。
明善內弟以聽泉主人扇索題，其畫則孟仁筆也。
展玩數四，舊京風致宛在目前，為書此以志感。

李郎扇骨王郎畫三十年前盛有名
老眼摩挲舊時墨
却思騎馬鳳臺行

次韻答陳魯南

魏闕江湖總帝臣
碧山金馬亦平分
機雲此日真無恨
隨陸當年也未文
清淺幾灣松谷水
飄搖一片海天雲
只應細雨斜風調
未可羣仙上界聞

庭前有栢屏
閔其束縛命小童
解之因題四韻
山中霜栢自亭亭
多事園丁強作屏
剪裁共驚鸞尾鍛

屈纏何異楚囚，扁濠梁水上魚。能樂茂叔窓前草自青。
釋縛解圍俄頃事，拂雲從汝到千齡。

綱菴先生懸弧中夏而延客，以初冬致賀。誠後
時矣。而餘觴猶可掇也。輒成四韻，庸助笑言。
寒日西風淨帽紗，清尊綠酒對黃花。閤思往事三春夢，
老覺流年兩鬢華。元節未妨寒食拜，壽觴應共海籌加。
小車莫厭頻來駐，前輩如公更幾家。

芙蓉金菊間開

時至園林百卉芳紛紛紫綠間青黃芙蓉不帶春風面
依舊寒花一處香

往歲阻風江上嘗登圖山望海門孫思和逸想
樓甚近而未之到也誦守溪翁之作遐思渺
然敬次其韻

連雲不見五城樓曾立金鰲頂上頭回首乾坤雙雪鬢
海風吹夢落滄洲

寓感

依阿每得意翫髒常失時古人已共歎末路轉多岐芝
蘭掩蕭艾鸞鷲避鳶鷂人衆天可勝而我猶人倚欣欣
詎可遏悄悄空自悲惟當秉明哲大運隨所之

短轡紆長駕行行未渠已川途屢回互常恐迷所指天
機妙倚伏人事亦難擬尋常婚媾筵中有冠戎壘有時
濤波翻舉網得雙鯉流行隨大化百歲詎能幾温涼久
矣更甘苦亦如此諧俗誠以難挹拙長已矣諒無當世
資庶曰寢息美

江河亘九地日月麗九旻明者必有本流者必有源一
極肇萬有至理無餘言行人望逆旅所覲一榻溫黃昏
幸即次遽欲慕乃垣以彼蟲鼠智妄啓般倖門高言視
一世舉目皆童昏六籍炳明訓靈扃儼威神十室且忠
信寰中豈無人誰歟仗三尺屏此魑魅羣

濂洛繼絕學紫陽集羣儒微言析豪末精義窮錙銖水
泮解衆惑春融歸一初餘功及藻翰金石垂楷模高蹤
邈難繼詭轡啓殊途擬拾珙璧瑕進彼珉與珞部屋雖

見斗肺肝本昭如彼狂諒已矣蒙也真何辜

淑人啓土有感隨事寫懷用辛巳韻

修門同入不同歸歸日青山未敢期

淑人喪還與臺章同日中傷頗重人

皆危之

鸞匣君今正丘首漁竿我亦上苔磯

五十年中幾別離誰知此別遂長歸紅顏白髮終千古
敢向蒼蒼怨小兒

今日青山始是歸為君三過着麻衣

淑人辛戌寅喪還以辛巳至是乃葬

可憐穉女隨人哭問着阿漚渾未知

為君礮石為君辭幾度含毫濕素衣
兩字龍光三錫命一行先上赤繒旂

並居華屋更無時回首風塵兩鬢絲
坐擁孤衾聽寒雨此情猶望有人知

昔司空表聖辭官後預營冢壙與賓客同游世
傳以為達子葬淑人迫於歲暮功雖未訖而規
制定矣營度往還得絕句十二首目之曰生
游棹歌非敢仰希先躅亦聊以寄興云爾

瑁湖烟水接通波，問訊塘橋路不多。
長向北花園下過，歸舟齊唱夜游歌。

通波門外水烟長，五里紅亭浸碧塘。
記得兒童遊戲日，夏家墳樹鬱蒼蒼。

十里湖光十里山，山容澁漾水雲間。
橫橋便是中分地，長與游人記往還。

水面風來聞磬聲，玉虛臺殿俯清泠。
年來晴雨無憑准，我欲雲階暫乞靈。

漸近青山水漸灣水灣迴處正當山山形飛落青霄鳳
水勢旋為碧玉環

玉環東轉帶虹腰一水東行赴海遙三百年來文物盡
行人猶自說塘橋

蛇嶺高盤翠作堆玉屏重擁鳳飛回南宮對客披圖處

誰道扁舟此日來

嘗畫松地圖與駱兵部來臣共
觀駱指吳會及鳳凰山南有地

顧浦北來山隱隱張村東下水悠悠不須細問青烏子

論姓還應我一丘

短垣疎柳枕橫塘中有尚書畫錦堂落日回舟思無限

漁歌一曲下滄浪

尚書李銅
至剛也

西來一水自山涇半入塘橋半鶴城南北回環如有意
往來長得順流行

萬古乾坤一寸心西風回首二毛侵青山幸有全歸地
敢向煙霞計淺深

執手交期終此地生游勝事起今年烏紗一幅青天下
畫楫雙支綠水前

近作小亭池上背牆面流左右林樾日色不到
而窻几虛明顏之曰息影味苓至而喜之賦
詩三首因次其韻

浮世空名與謗隨欲從鼃黽問公私年來悟得安心理
只在池亭隱几時

獨立常疑與世違回看世路有危機清池綠樹紅窻裏
敢道先生昨日非

前頭千古後來今俯仰中間一寸心若對此君能不愧

也應無事短牆陰

送朱原誠之桂林

有後引

曾與江樓共績文書聲猶想夜深聞風雲入手無多事
場屋掄才獨後君八桂曉山蒼玉立兩江春水碧羅分
聖朝綏遠須循吏應使棠陰接四隣

朱君原誠少嘗從予學連蹇場屋以太學生出判桂林之奉議州臨別贈此奉議古百粵地近代始列職方隣邦牧守猶世授親仁保民副九重綏遠之意正

原誠今日事也故見之卒章

吳子南將赴羅源問保民保身之道予告之曰
子家一閒翁之積厚矣子能承之推是心以
勤施於政將無適不可宜直羅源而況其身
哉子南請書於卷遂彙括為韻語以貽之體
裁音律固在所不論也

不見閒翁三十春每將淳德衆中論蘭階茁秀看吾子
花縣鳴琴問保民萬化流行自興孝九經倫序起修身

青雲賸有前頭路記取長沙運甓人

次韻伍松月都憲松江感事

本無仙術可休糧舉目鄉關兩鬢霜忽枉新吟話疇昔
如觀舊俗飽倉箱當時經畫垂金石幾日飄揚趁糝糠
復古周宣仗申甫老生翹首頌康穰

來詩前聯云米穀陳陳幾四億閭閻比比足千箱問
之實三十七萬幾千石蓋成化辛酉以公常州推官
來盤濟農餘米今聞倉廩皆空故有此作甲申三月

望日識

莫三江舟中有作

四月二十一日

淺碧婁江水
蘼蕪被兩涯
平生到曾未
此日看成悵
望雲龍會淹
留絮酒期中
岡知近遠煙
樹鬱參差

憶昔曹園別
公西我自東
竟成千載恨
猶幸一尊同
往事鴻飛外
浮生蝶夢中
有懷知莫問
梁月總帷空

多暇推南省
公來日糾紛
執經辭斷斷
尊主意勤勤
鼎虛黃閣颺
車已白雲向
來庭左辨列
柏想猶聞

進退關憂樂哀榮具始終策名龍首重節惠奉常公桃
徑春陰遍槐庭晚色濃濮園初議在天下想遺忠

葉竹憲出示月中折枝桂花上有司馬蘭亭題
字

嫦娥宮殿隔人寰玉戶金箱夜不關桂子定知何歲落
至今清影竹窻間

眼中前輩風流遠物外閒情日月長小閣垂簾對遺墨
天風時送木樨香

葺舊居有感

成化丙申移居時予年十七今四十九年矣

憶昨移家日真移一束書夢猶循舊境時亦待闕居俯仰嗟隣近經營荷慶餘兒郎誇善頌風木正愁予

次韻答尤元吉

少日游歌伴惟君實俊英連飛才豈後幸會我方丁望道如瞻華紬書若泛溟本期同晚翠而獨借春榮逐隊升金馬聯輝傍玉衡五雲環帝宅列宿拱元精往事嗟投杼平生幾折肱全身寧論得學道敢希名尺寸時頻

揣鎚銖亦細稱青雲珠履客滄海雪鷗盟竹徑門初啓
桃蹊蔭已成不求元避悔無愛復誰憎種玉思分潤栽
蘭欲藉馨酒杯通大道詩律寫幽貞錦繡三千段空靈
一寸尙晚雲低樹密落月到牀明調燮存刀匕行藏付
寢興故人無我棄時誦日新銘

秀州塘過慶雲橋南泖為小溪山人李公玉家
其上公玉善談星數星之著者為斗人呼其
地為斗溪君遂因以自號

秀塘東分一支曲溪上幽人數間屋夜深星斗轉遙空
繞屋明珠湛寒淥幽人說天三十年三光磊落胸中懸
胸中溪底交映澈上與元化同回旋湘纍卜居問詹尹
支磯亦訪成都隱洛陽車騎塵染衣壘浪五湖聲跡泯
茫茫大運誰主持懸生列象古猶斯榮光德耀空載籍
飛流彗孛交梭馳扁舟何日溪上路為我一洗平生疑

顧虛齋在湖南聞予致仕有作席間誦之次韻

為謝

塵埃袞袞逐浮名，泰華鴻毛比重輕。
九折路窮人亦倦，三江舟到水還生。
詩來楚澤流新詠，曲按貞元想舊聲。
斟酌此堂堪一醉，向來書劍幾同盟。

十一月十四日夢人示所注周易前列卦爻後
系衆說朱闌素紙繕寫極精緻，予以錢求卦得
小畜之坤後四日冬至紀之以詩

玉版仙書字若蠅，金錢神語更分明。
五龍不極行天勢，一牝猶存未雨名。
林壑故應朝市隔，陽和默自水泉萌。

清臺雲物今誰紀搔首關干北斗橫

無題

世事古來如意少光陰畢竟自家多望塵潘岳今何許
帶索榮期且漫歌江檻月寒梅弄影湖橋春動水增波
無言一卷牀頭易消盡西風兩鬢皤

東江家藏集卷三十五